

24 SEP 1996

Perhimpunan-Mahathir

DR MAHATHIR DISAMBUT SECARA BESAR-BESARAN

KOTA BAHARU, 24 Sept (Bernama) -- Ketibaan Perdana Menteri Datuk Seri Dr Mahathir Mohamad ke Kelantan pada 3 Okt ini untuk menghadiri Perhimpunan Penyatuan Melayu akan disambut secara besar-besaran.

Presiden Parti Melayu Semangat 46 Tengku Razaleigh Hamzah akan mengetuai acara sambutan sebaik saja Dr Mahathir tiba di Lapangan Terbang Pengkalan Chepa pada pukul 3 petang, kata Ketua Penerangan S46 Kelantan Datuk Wan Omar Wan Majid.

Perdana Menteri kemudian akan diiringi oleh 1,450 kenderaan menuju ke Istana Kota Lama untuk menginap di situ.

Dr Mahathir seterusnya akan disambut dengan paluan 20 pasukan rebana ubi dan kertuk setibanya di tapak perhimpunan Sekolah Kebangsaan Padang Garong dekat sini.

Perdana Menteri akan diarak oleh 10 pasukan pemuda dan pembawa bendera Malaysia, negeri, S46 dan UMNO serta 50 wanita membawa pulut semangat menuju ke pentas.

Perhimpunan Penyatuan Melayu itu diadakan menjelang pembubaran S46 bagi membolehkan anggota-anggotanya menyertai UMNO.

PAS juga dijangka menganjurkan perhimpunan raksasa di Stadium Sultan Mohamed Ke-IV di sini pada malam keesokannya.

Menurut sumber kerajaan negeri, majlis anjuran PAS Kelantan bertemakan "Amanat Y.A.B. Tok Guru" itu akan diadakan mulai pukul 7 malam hingga 12 tengah malam.

Sumber itu berkata lebih 20,000 penyokong dan anggota parti itu dijangka menghadiri perhimpunan itu. Mereka termasuk Presiden PAS, Haji Fadzil Noor, Timbalannya Haji Abdul Hadi Awang dan Menteri Besar yang juga Mursyidul Am parti itu, Datuk Haji Nik Abdul Aziz Nik Mat. -- BERNAMA

WM NH MAI